

Plenchi

Bèl a bati

Bèlèmmmmmm bèlèm tring tringggggg nos ta yen di informashon pa boso atrobe. Yega ku ánimo i sin duda paso nos plenchi ta unu pa yená bu ku informashon positivo. Ta hopi akto, akshon, aktividat tin ku ta yena nos ku plaser i satisfakshon. Muchu mas ku esnan negativo. Nos tin hóbenannan ehemplar ta duna nan maksimo pa progresá. Dosentenan ku ta traha ku alma i kurpa pa duna nan skol i nan alumnonan de lo mehor. Tempu a bira difisil pa tur hende, pero si den difikultat bo keda ku un kurason di misericordia i sigui hasi bon ta un muestra di madures. Un muestra ku e hende i e meta mas grandi ta pa kontribui i sigui duna un man pa adelanto no di bo mes sino di esnan ku bo ta traha pe. Shonnan ta hopi mayor tin ku ta traha duru pa lanta nan yunan korekto. Nan ta siña nan yunan kara responsabilidat. Esei ta mas importante ku tur kos. Hopi biaha esnan ku ta siña nan yunan para pa berdat i rekonosé bo fayó i tuma e straf mara na dje, lo kosecha yunan ku mañan lo trata nan tambe hustu i ku respèt. Siña nan hui pa responsabilidat ta krea ku nan ta forma ku e pensamentu ku semper ta e otro i straf i medida ta konta pa tur otro i no pa nan. Diferente biaha e muchanan aki ta bira un dolor di kabes pa e mes mayornan aki despues. Nan ta apliká loke nan a siña ku bo mes anto bo no por rabia paso nan no sa otro. Mayornan ehemplar sigui ku e bon trabou di duna bo yu un ròl importante den bo bida. Hasie bo mishon pa lanta un yu responsabel. Diferente dosente ta duna mas ku lès so. Nan ta duna amor, kuminda si mester na nan alumnonan. Pero e hasidó di bon nan aki no ta bin den publisidat. Paso nan ta hasie pa e bondat i amor den nan kurason i no pa haña publisidat of pa show. Laga nos hasi orashon pa kada mayor, kada edukador den e tarea difisil pa guia hóbenannan riba e bon kaminda. Stimashon i amor no ta hasi loke bo yu ke bo hasi, of trose berdat pe. Stimashon ta bisa bo yu of alumno ora e ta fout i siñe karga responsabilidat pa esaki.

Nos plenchi ta yen di potret awe pa boso mira kosecha di bon trabou i amor pa otro.

Un felis djasabra i pa djaluna un siman bendishoná.

Riba roster

Hobenan di Frater Evoniusschool a prepará un sukulento lunch manera profeshonal. Nan tabata huespèt na Maris Stella SBO i a bisti unifòrm di kòki, drenta kushina profeshonal sofistika i kushinà, pa despues kome huntu ku invitadonan. Funshonarionan di RK i te hasta un funshonario di Hoge school Amsterdam, kaminda mener Said a studiá, a keda malkriá ku e menu di trè kursu aki. Un pabien na e hóbennan. Nan yufrou di klas, yufrou Irviana Turner i mener Said Lourens ku ta siña nan kushinà por ta orguyoso di e resultado. E komportashon tabata profeshonal i e kuminda ta pidi repetishon. Pabien na Frater Evoniusschool.

Un danki na Maris Stella su tim di dosente i tambe e hóbennan ku a asistí e alumnonan di Frater Evoniusschool. Boso tabata kampion





Not'é riba bòrchi

Radulphus College a kuminsá ku su biahe di orientashon pa su alumnonan di V5 pa asina prepará nan pa por skohe konsiente kiko i unda nan ke bai studia.





Den agènda

Dianan liber di skol

- **24 di aprel te ku 8 di mei 2016**
- **Fakansi grandi 4 yuli te ku 10 ougustus 2016**

27 di aprel, 2 i 5 di mei dia liber pa tur trahadó

Konferensha pa personal skolnan katóliko 8 di ougustus 2016

Promé dia di skol pa alumnonan ta 11 di ougustus 2016.

Mi ta konta

20 di aprel último a rekordá 74 aña di matansa chines aki na Kòrsou. Gobiernu huntu ku Stichting Eerherstel oorlogsslachtoffers Curacao i sindikato representá pa sr. van Lamoen di S.Tr.A.F. a organisá e enkuentro aki. El a tuma lugá kaminda e kampamentu di detenido tabata na Suffisant 74 aña pasá. 15 chines prosedente di Rotterdam, ku tabata traha pa Curacaosche scheepvaart Maatschappij , a keda matá i mas ku 40 a keda gravemente heridá. Tur esaki paso nan a welga pa

haña un trato igual ku Hulandesnan paso nan tabata bou di situashonnan inhumano.

E kurpanan sin bida a kedá derá ánonimamente i no a informá nan famia di e suseso. Te ku awe no a duna hustisia na e alma de e defuntunan o nan sobrebientenan. Riba e potrèt nos por mira kon a rekonstruí e matansa chines di 20 di aprel 1942, bou di guia di grupo Teatral KADAKEN. St. Jozef VSBO su alumnonan tambe a aktua den e drama rekonstruí aki.



Un preñchi

Kolegio Willem Ellis a resultá ganado apsoluto di kampionato femenino di futbòl interinsular. Mira nos kampionan riba e potrèt aki. Pabien hóbennan, pabien mayornan i pabien na nan dosente i coachnan. Boso ta kampion.



Mucha djispou

Pedro ta bai dokter paso e ta tembla kada dia mas tantu.

Dokter: “sr. Pedro, kisas ta paso bo ta bebe demasiado?”

Pedro: “no, esei ta problema. Ultimo dlanan mitar di e glas ta basha abou dor ku mi ta tembla. Mi mester a hasi e kantidat di bòter pa dia dos biaha mas tantu.”